

## **Balua gba Polo pi Tito Eli na kalanu**

Tito inde akolo nani kpála na kulu bhú dabili bini ne Polo, ani atsia adu di ateteke ani bhú kulu gba e na Ebhe inde ani adu adholo ne e, ani adu nani mupagano inde adji bua e, ani atsia aziba Kilisito . Polo aye balua inde pi Tito, makombi inde adu ateteke ani bhú Dadjua gba Ebhe na Kelete-o. Polo a'o nani ká ani oo ngubula natsia 'kpí li kulu na Dadjua gba Ebhe ang-o. Ngbengbe 'ngú bhú balua inde bata.

Engú na kalanu u aye bhú balua inde-e, ko nasuno pi Tito dasundu inde a ayo me obhelesi okpála na Dadjua gba Ebhe du ne e, adu kpi ne bhe na sisiti inde li okpála na Kelete nde ne e ko. Pipita-a, Polo ngaha líli pi Tito me ani du musuno pi limbi okpála ngangá na Dadjua gba Ebhe-o. Limbi okpála maka: obhosi na bhelesibhelesi, omakombise, obalise ne olisi bhe na bhelesibhelesi (inde a ayo me u ha líli pi otsalisi). Li soso-o, Polo ngaha líli pi Tito pindji lele nadholo gba makilisito, ne nadu ne mukunda, ne nadu ne guo 'ngú ngubula nakpe yala, ne nakpe tolo, a la di na gbogbo bhusu bhú Piga gba Ebhe.

**Ongbengbe ongú inde bhú bhuku inde-e ngae inde:**

Eli na kalanu 1:1-4

Obhelesi okpála na Piga gba Ebhe 1:5-16

Engú a ayo me limbi okpála mene e bhú Piga  
gba Ebhe 2:1-15

Naha líli gba Ebhe ne napa me kpála dū ne  
nalila li e 3:1-11

Eli na soso 3:12-15

### *Polo yi Tito mayi*

<sup>1</sup> Ma aye balua inde-e ngama Polo, bali gba Ebhe, la di bhulu titima gba YesuKilisito . Ebhe aha kulu napana kpadji na nabhuka pi okpála inde ani abhu o-o muma ngubula me u bhuka ni, amba u ke di mboli kukulu nasuno inde ati ne mukobho inde ngadhoge ani-o. <sup>2</sup> Abhomu-o, u ti da nadu ne 'to o me o osia mukobho na duduma masia. Ebhe inde i papa eu de-e, apana nani mukobho ango-o pi omaha e bhutode kala me ani bho kokpi ne doto. <sup>3</sup> Nedhinga inde li Ebhe a'o e akolo lie, Ebhe, Mukobho gba ni-e amene me omaha ni mbila 'li ni li kpadji nakpokpo Badha Ngali . A bhomu-o kulu inde ani aha líli me ma mene e-o.

<sup>4</sup> Ma gaye balua inde-e pi mu Tito. Mu maka kukulu ndili gba ma bhú 'bu nabhuka inde ngakpetse ni ko. A ayo me badha bhú 'bu ne guo 'ngú gba 'Dyi ni Ebhe, di ne Yesu Kilisito Mukobho gba ni-e du ne mu bhú dabili bini.

### *Lele mukobho gba obhelesi okpála na Piga gba Ebhe*

<sup>5</sup> Ma a'o ka mu bhú kpomə na Kelete, amba mu ndjia naleke ndu 'ngú hana inde atigala-o. A ayo me mu bhú obhelesi okpála na Piga gba Ebhe-e bhú ndu gudhu hana bini ne bini nakpata olili nako ma aha e pi mu-o moko me, <sup>6</sup> a ayo de me

u u bhele kpála na Piga gba Ebhe-e ne siti 'ngú-o de. Aní dū ne koli ɛlɛ bini. A ayo me ongisi gba aní-e dū omabhuka . U améne engú bini de inde u 'í uo ka e me, a ko ongisi na sisiti, di ne me, a ko ongisi na ndjondjo.

<sup>7</sup> Bhele kpála na Piga gba Ebhe-e ngalila kulu gba Ebhe-e ngae. Kaka-a, a ayo de me u u aní ne siti 'ngú-o de. A adú kpála na 'ngbé 'ndji de. Aní adú nake 'ngú lie má gala de. Aní ahá lie pí pandi de. A adú bhulu nagu gbele de. Aní adú nagili tia li siti kpadji de. <sup>8</sup> Engú bini, aní dū nasia ogomago ndjindji. Aní kunda bádha 'ngú. Aní dū nabhundja 'ngú ndjindji. Aní dū ngbingbili. Aní dū bubu kala okpála di ne kala Ebhe. Aní dū kpála naholo bua e ka 'ngú maholo. <sup>9</sup> A ayo me aní gbite lie kpekpeke li Eli na kukulú inde atí ne engú inde ní asuno e pí aní-o. Abhomu-o, aní tí da nato masi bhú okpála koko ne nasuno na ngbingbili-o. Aní tsia tí la di da nasuno pí okpála inde nga'o bhayiki li nasuno gba aní-e me uo li pulu kpadji.

### *Polo agbele 'dje Tito pindji nasuno na eu*

<sup>10</sup> Okpála bhelé ne kpéke 'ndji, a ane la mane bhú ká okpála inde ngasuno me a ayo me omakilisito kpata líli gba omaYuda li kpadji nali gandja-o . U ngapite okpála koko, u di ngapa ongú na padhá padhá. <sup>11</sup> A ayo nagbite 'bhè uo, anga u ngangbingi 'ndji opiga libhomu ne nasuno ongú inde a ayo nasuno e de, ngabula nasia tia li siti kpadji.

<sup>12</sup> Suka kpála bini na kpòmè na Kelete-e, adu nani bhulu imbilangu. Ani apa nani ne 'bhe e me: «Okpála na Kelete-e, a ko odidili obhulu eu, uo maka onu na 'gú. A ko obhulu ipio, u ngabhundja bha bini bula 'ngú na 'zu.» <sup>13</sup> Engú inde ani apa e bhomu-o, a ko kukulu 'ngú. Kaka-a, mbe bhú 'ndji uo tété kpekpeke, ngubula me u lu kpekpeke bhú nabhuka, <sup>14</sup> u a'ó la di 'ndji o li ongú na padhá padhá inde li omaYuda ngagbe e bhú 'ndji o de. U adú di namene líli gba okpála bhende ngayala kukulu 'ngú-o de. <sup>15</sup> Pi okpála bhende kala Ebhe bubu-o, ndu 'he hana bhadi bubu. La-a, pi okpála bhende kala Ebhe bubu ade-e, inde ayala nabhuka-a, ehe bini pi uo bubu belegu ade bini. Padhá de, anga imbilangu di ne bua nakpokpo kú 'ngú gba uo-o asiti. <sup>16</sup> U ngapa me, o mbila Ebhe hana, engú bini ongú inde u ngamene e ngasuno me u mbila ani de. Engú inde u ngamene e nga li okpála de, a nga la di li Ebhe de. A ko okpála na kpekpeke 'ndji. Uo la di ne angu namene bádha 'ngú belegu ade bini.

## 2

### *Polo aha líli pi omabhuka*

<sup>1</sup> Engú bini, ngamu Tito-o, pa engú inde ati ne nasuno na ngbingbili-o. <sup>2</sup> Pa pi obhosi bhende na gbegbegbe-e me, u du naholo bua o ka 'ngú maholo. U du ne okpála inde u ngamanga o mamanga. U du nabhundja 'ngú ndjindji. U lu la di ne angu bhú nabhuka, ne mukunda, di ne 'ndjá bua. <sup>3</sup> Ha di líli pi olisi bhe na

obhelesibhelesi-o. Pa pi uo me mukobho gba uo-o du bubu kala Ebhe. U adu napa osisiti 'ngu li okpala koko de. La di-e, u adu obalise na pandi de. A ayo me u suno pi okpala koko ongu na ndjindji. <sup>4</sup> U mene mo-o, i tsia suno pi otsalisi me, u du ne mukunda pi obhosi gba o, di ne pi ongisi gba o, <sup>5</sup> u du nabhundja 'ngu ndjindji, u adu akunda obhosi ngangá de, u 'o 'to o 'to piga gba o, u du ndjindji. U mene la di olili gba obhosi gba o makpe, ngubula me kpala bini asobho eli gba Ebhe-e de.

<sup>6</sup> Ha di lili pi omakombise me, u du namene ndu 'ngu hana li lelele. <sup>7</sup> Ngamu makpe-e, a ayo me mu suno bhú okulu gba mu-o ongu na ndjindji, inde li okpala ti da nakpata nganda e. A ayo me nasuno gba mu-o du ngbingbili, amba adu di bhe li okpala ti da namanga e. <sup>8</sup> A ayo me 'li mu du ngbingbili, eli inde li okpala ti da naboyo e de, amba obhulu yala gba ni-e asia engu na sisiti napapa li ni de. Abhomu-o, u tsia dje namu na paká paká.

<sup>9</sup> A ayo me, obalise mene lili gba omakulasi o bhú ndu 'ngu hana. A ayo me u du amene engu inde anga li omakulasi o. U adu adjidji 'ngu sa 'li uo de. <sup>10</sup> U azi 'he gba omakulasi o de. Engu bini, u du ndu 'kpi hana ngbingbili li papa gba uo-o. U mene mo-o, li okpala tsia u me nasuno inde pindji Ebhe, Mukobho gba ni-e ndjindji ka nau lele maka u ngakobho lie-o.

*Yesu akunda me ni du piga gba ni*

<sup>11</sup> A moko, Ebhe asuno bádha bhú 'bu gba e inde ngakobho ndu okpála hana bhú siti 'ngú-o asuno. I dú kaka de-e, kpála bini de kóbho de. <sup>12</sup> Bádha bhú 'bu ang-o ngasuno pi ní nayala siti 'ngú. A la di ngasuno pi ní nayala ogumu ongú na doto, amba nedhinga ní nde nga lie pí doto inde-e, a ayo me ní du nabhundja 'ngú ndjindji, ní du namene engú inde ngbingbili, di ne bhende nganga li Ebhe manga. <sup>13</sup> Ní du namene moko ngubula nadjeke ekpí na djali inde ní nga'o 'to ní 'to e-o. Li 'kpí ang-o, Yesu Kilisito inde Ebhe gba ní na ngbéngbé, di ne Mukobho gba ní-e, agie lie píla doto bhú sangu gba e ko. <sup>14</sup> Aní aha mukobho gba e makpe pi ní ngubula nagbegbe ní bhú ndu osisiti 'ngú hana. Aní abhu ní me ní kolo piga gba ni makpe, piga inde bubu kala ni-o, amba ní du piga inde abedhe ne gumu namene babadha 'ngú.

<sup>15</sup> A bhomu-o engú inde ayo me mu suno e ne angu mu hana, nedhinga inde mu ngato masi lie bhú okpála inde ngadje mu, di ne nedhinga inde mu ngambe lie bhú 'ndji obhende i dje mu de ko. Mo oká kpadji pi kpála bini de me aní u mu padhá-a de.

### 3

#### *Lele nadu ka omabhuka bhú ká omupagano*

<sup>1</sup> Bhundja pi ndu omabhuka hana me, a ayo me u manga ongámási, di ne okpála bhende ngaú pí 'ndji uo-o. A ayo me u mene líli gba uo-o, amba u du bedhe ngú namene ndu ongú na babadha

hana. <sup>2</sup> A ayo de me u di kpála-a de. U adu obhulu gbele de. A ayo me u du okpála na guo 'ngú . A ayo me u du ndu 'kpí hana ne bhuku bua pi ndu okpála hana. <sup>3</sup> Padhá de, anga nganí di-e, ní adu nani ongingi. Ní adu nani okpála na kpekpeke 'ndji. Ní adu nani li pulu kpadji. Ondu ngangá gamu 'he, di ne oehe nanga li ní manga a'o nani ní obalise. Mukobho gba ní-e adu nani sisiti. Ní abedhe di nani ne ogumu 'he bedhe. Ní adu ayala okpála koko, u atsia adu di ayala ní.

<sup>4</sup> Engú bini, nedhinga li Ebhe, Mukobho gba ní-e asuno bádha 'ngú di ne mukunda gba e lie pi okpála-a, <sup>5</sup> ani atsia akobho ní. Ani kobho ní ka ongú na ngbingbili inde ní amene e-e de. Engú bini, ani akobho ní ka ani adje ndjinga ní lie ko. Ani akobho ní li kpadji naha Bu Bhobua pi ní. Bu Bhobua ango-o a'e osisiti 'ngú gba ní-o, ani atsia aha mukobho na mbia pi ní, ne lele nadu na mbia. <sup>6</sup> Ebhe atuko Bu Bhobua ango-o pi ní bhelé li kpadji na okulu inde li Yesu Kilisito , Mukobho gba ní-e amene e ko. <sup>7</sup> Abhomu-o, Ebhe atsia amene me ní kolo ngbingbili ka bádha bhú 'bu gba ni ko, amba ní ti la di da nasia mukobho na duduma, inde ní nde ne 'to ní 'to e-o. <sup>8</sup> Eli bhomu-o, a ko eli na kukulu. Ma akunda la di me, mu lu pépé kpekpeke, amba okpála hana inde abhuka Ebhe-e, ha lio ngú namene ongú na babadha. A bhomu-o engú inde ndjindji, inde di ne tata pi ndu okpála hana ko.

<sup>9</sup> Engú bini, mo odú namene obhayiki na ngingi de. Mo odú namene kpekebho li nakpokpo ndjándjá kpokpodumu de. Mo odú

namene otolo di ne bhayiki pindji líli gba Moidje-e de. Padhá de, anga ndu ongú bhomu-o hana padhá, tata la di tété ade. <sup>10</sup> Mbe bhú 'ndji bhulu nagbogbo bhusu omabhuka bhutsibhutsi na bini, mu mbe bhú 'ndji ani bhutsibhutsi na bhisi, amba pipita ani dje mu de-e, mu de gbe ani bhú ká uo magbe. <sup>11</sup> Mu mbila ndjindji me, ngua kpála bhomu-o ayie li ngbili kpadji ayie. Ani atsia a'o lie bhú mangimbo ngae makpe, ka ani azi 'ndji e lie bhú namene siti 'ngú-o.

*Polo aha olíli na soso pi Tito*

<sup>12</sup> Ma ngatima Alatemasi pi mu. I du ani de-e, li ma atima Tisike. Nedhinga ani akólo lie, mu de mene ne kpéke ngú nago nabhaka ma bhú gudhu na Nikopolisi. Padhá de, anga ma apa me nedhinga na zini-e ané ma me, ma nde oo ko. <sup>13</sup> Tsia 'kpí li 'ngú na dhuku gba avuka Djenasi, ngauo ne Apolosi-e ndjindji, amba u adú bhú ndibhili 'he bini de. <sup>14</sup> A ayo di me okpála gba ní-e mbila lio ne namene ongú na babadha ngubula me u du ne oehe ngubula nateteke okpála inde ne gugumu-o ne di. U mene mo-o, kulu gba uo-o tsia zú nguwa.

<sup>15</sup> Ndu okpála hana inde bhú dabili bini ne ma-apa me, o yi mu mayi. Pa pi ondaise ní na makunda, inde ní nde ne o bhú 'bu nabhuka me, ya yi uo mayi. A ayo me, Ebhe tuko bisagu pí ndu yi hana!



**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022

6b4904fb-f8ce-5931-8218-7cee8914232c